

亦嘗聞杭之山川人物雄秀奇麗夸靡饒阜可樂者乎孺子曰先生不以不敏爲難與言得聞咳唾之音不敏以爲幸先生將何以教之

先生曰杭之故封左溯江右具區北大海南天目萬川之所交會萬山之所重複或瀨或湍或灣或淵或岐或孤或袤或連滔滔湯湯渾渾洋洋纍纍礧礧隆隆叩叩若金城天府之彊其民旣庶而有餘旣姣而多娛可導可疏可舠可桴可跋可踰可攢可車若九洲三山接乎人世之廬連延迤邐環

二千里邑居牧聚蟻合蜂起高城附之如帶繞指隱以爲脊折以爲尾因河塹華不足方北方城漢水胡敢競美當管夫差之盛時內姑蘇以爲心腹而外城此以爲身草車千乘甲士萬人粟支十年帛散千屯洒汗成雨連衽成雲乃有大夫伯嚭行人伍員之徒通其謀將軍孫武公子夫槩之徒用其衆嘗以國政之閒發徒截江命習戰事於是張翠羽之蓋靡魚須之旂揚鶩足之楫曳龍尾之舟凌鱣鼉之車戲貴獲之儔飄鼓吹乎下風隘戈矛